


TEZAUUR LITURGIC

18 IANUARIE

**ACATISTUL
SF.PREOT-MUCENIC
NICOLAE
KRASOVSKI
DE LA
VOINOVA GORA**



MOSCOVA, 2000



Акафист

священномученику Николаю

Красовскому, пресвитеру

Кондак 1

Избранный угодниче Христов и дивный благочестия подвижниче, веры Православных поборниче, от безбожников даже до смерти пострадавый, песньми духовными велегласно восхваляем тя, святой отче наш Николае, Ты же, яко имеяй дерзновение ко Прославльшему тя Господу, даровавшему в тебе нам новаго предстателя и скорого в бедах помощника, молись о нас Всемилоостливому Спасу, да зовем ти:

Радуйся, священномучениче Николае, теплый молитвенниче о душах наших!

Икос 1

Ангелов сожитель и человеков заступник воистинну явился еси, святой новомучениче Николае, благоволением всех Творца Христа Бога нашего, Егоже возлюбил еси от юности и за

Него же претерпел еси (скорби многия) и кончину мученическую; ныне же престолу Вседержителя со всеми святыми предстоиши, отраду и вспоможение даруеши всем с верою и любовью вопиющим ти сице:

Радуйся, в неизреченной славе Творца мира созерцающий;

Радуйся, во благоухании святыни присно почивающий;

Радуйся, всех приходящих к тебе благодатию озаряющий;

Радуйся, от заблуждений духовных нас исцеляющий;

Радуйся, любить Бога и волю Его творити нас научающий;

Радуйся, в добродетели терпения нас утверждающий;

Радуйся, огнем молитвы твоея стрелы вражия пополяющий;

Радуйся, беды и печали от чтущих тя отгоняющий;

Радуйся, священномучениче Николае, теплый молитвенниче о душах наших!

Кондак 2

Видящие благочестивыя родители твоя
(,священномучениче Николае,) пресвитер
Константин и матушка Надежда тя, чадо свое
благочестием и богомыслием с детства
Всевышним одаренное и крепкою любовью к
Христовой Церкви озаренное, в радости
духовней воспеваша о тебе Господеви: Аллилуйа!

Икос 2

Разумом свыше просвещаемъ, угодниче
Христов, житие добродетельное возлюбил еси;
богобоязненным родителям твоим внимая, во
страсе Божии и благочестии возрастал еси; к
молитве и чтению книг священных навыкл еси,
и во трудах твоих образ будущего
добродетельнаго жития явил еси. Мы же,
дивящееся таковому от юности твоея усердию
вопием ти сице:

Радуйся, рода честнаго отрасли благородная!

Радуйся, лозо винограда Христова
многоплодная!

Радуйся, чадо молитвы родителей
благочестивых!

Радуйся, надеждо и утешение сердец их
боголюбивых!

Радуйся, от малых лет сладость молитвы
вкусивый!

Радуйся, Божественное Писание возлюбивый;

Радуйся, от юности служить Христу
возжелавый;

Радуйся, нелецемерную по Бозе ревность
показавый;

Радуйся, священномучениче Николае, теплый
молитвенниче о душах наших!

Кондак 3

Сила Христова осени тя, преславне Николае,
и дарова ти крепость мужественнее претерпети
искушения врага невидимаго, его же стрелы
разженные угасил еси твоими слезными к Богу
молитвами ныне же убо, причащаяся славы
небесныя со всеми новомученники
российскими, предстоиши Христу – Царю
Славы, воспевая: Аллилуйя!

Икос 3

Имуще в боголюбивей душе твоей ревность ко
Господу, не возжелал еси, богомудре Николае,

учеников твоих вести на сбирище нечестивое в храме поруганем (проводимое) совершаемое и сего ради от учительства изгнан был еси, а послеже и иные скорби многие от властителей богоборных претерпел еси. Мы же вся сия ныне поминающе, просим тя, угодниче Божий, научи и нас о едином на потребу мыслити и прими величания сия:

Радуйся, века сего суемудрия отвергати нас научающий;

Радуйся, от искушений и соблазнов избавляющий.

Радуйся, дев и юношей в целомудрии утверждающий;

Радуйся, друг друга тяготы носить нас наставляющий.

Радуйся, от плевел ненависти сердца наша очищающий;

Радуйся, светом любви нелицемерныя нас озаряющий.

Радуйся, от греховных навыков сердца наши освобождающий;

Радуйся, на милость Божию уповати нас подвизающий.

Радуйся, священномучениче Николае, теплый
молитвенниче о душах наших!

Кондак 4

Буря скорбей и напастей, злобою мира сего
воздвигаемая не ослаби крепкия любви твоея
яже к Богу, угодниче Христов, вся бо с верою и
надеждою претерпел еси, в Бозе токмо отраду и
утешение обретая и поя Ему : Аллилуйя!

Икос 4

Слышавше, святой Николае, глаголы
Спасителя нашего, яко «жатва убо многа,
делателей же мало» (Лк 10:2), сему поревновал
еси, и, егда сан священный прияти сподобился
еси; со усердием провозвещал еси учение
Христово, наставляя паству твою ни одесную,
ни ошую уклоняться и верность матери-церкви
сохраняти; сего ради твоя пастырские
добродетели хваляще тя, Боголюбче, ублажаем и
на предстательство твое уповая, вопием ти сие:

Радуйся, священство, яко великий дар
Господень, восприявый;

Радуйся, обильно в хиротонии благословение
небесное стяжавый;

Радуйся, Жертву безкровную со страхом и трепетом совершавый;

Радуйся, словом мудрым всех приходящих к тебе питавай;

Радуйся, твердо обновленческие глашения отвергавый;

Радуйся, дерзновенно расколоучителей обличавый;

Радуйся, от теплохладия и маловерия нас исцеляющий;

Радуйся, в вере и верности Богу нас утверждающий.

Радуйся, священномучениче Николае, теплый молитвениче о спасении нашем!

Кондак 5

Боготечней звезде уподбился еси, священномучениче Николае, многих бо к Солнцу Правды Христу путеводил еси словом твоим премудрым и примером преславнаго жития твоего, еже посвящено бысть Богу и ближним твоим. Тем же блаженство вечное со всеми святыми унаследовал еси и с ними же (предстоя престолу святых Троицы) пение хвалебное воспеваеши: Аллилуйя!

Икос 5

Видевши обителей святых разорение и закрытие, иноков честных изгнание, восскробел еси, преславне Николае, яко не возмогл еси чина ангельского обшник быти; обаче в бушующем мире душою надмирно пожил еси, труды ко трудам прилагая, подвигом добрым до конца подвизаясь. Сего ради зовем ти:

Радуйся, паче всего земнаго Христа возлюбивый;

Радуйся, храм Божий в сердце твоём сотворивый.

Радуйся, благое иго Христово на себе восприявый;

Радуйся, в житии твоём угодником Божиим подражавый.

Радуйся, кающимся слезы утешительныя низпосылающий;

Радуйся, тайно творити добродетели нас научающий.

Радуйся, к благочестия подвигам нас призывающий;

Радуйся, в кротости и смирении нас утверждающий.

Радуйся, священномучениче Николае, теплый молитвениче о спасении нашем!

Кондак 6

Проповедник веры Христовой и ревнитель благочестия не словом токмо, но и всем житием твоим был еси, всехвальный священномучениче Николае; тем же и Церковь Святая достойно почитает подвиги, труды и страдания твоя, иже Спасителя ради подъял еси, немолчно Господеви воспевая: Аллилуйя!

Икос 6

Возсия в боголюбивой души твоей, отче Николае, свет истинного боговедения; ты бо, благодатию Божественною просвещаемь, заповеди Христовы о любви к Богу и ближнему со усердием радостно исполнял еси. Мы же, сие ныне поминающе, молим тя, святой новомучениче, озари и нас лучами добродетелей твоих и милостиво приими величания сия:

Радуйся, состраданием скорби бедствующих утешавый;

Радуйся, обездоленных хлебом насущным питавай.

Радуйся, веру твою делами любви утвердивый;

Радуйся, образ и подобие Божие в ближнем возлюбивый.

Радуйся, от похоти себялюбия нас исцеляющий;

Радуйся, прощати и благословляти ближних нас научающий.

Радуйся, милосердие в сердцах наших пробуждающий;

Радуйся, страждущим служить нас подвизающий.

Радуйся, священномучениче Николае, теплый молитвенниче о душах наших!

Кондак 7

Хотяще веру Православную в веси Дровосецкой утвердити, святой отче наш Николае, крест Христов с кротостью восприял еси, укрепляя чад твоих духовных в добродетелех христианских; смирении, кротости, любви к Богу и ближнему. Мы же,

ныне молим тя, угодниче Христов, предстательством твоим испроси и нам сия боголюбезные добродетели; да не поработимся страstem греховным, но чистым воспоем Спасителю Нашему: Аллилуйя!

Икос 7

Дивныя показа дела Своя Господь в тебе, новомучениче Николае, ибо все житие твое на земли многими печальми и болезнями исполнено бе от клеветы и досаждения, укорения и иных многих бед и напастей. Ты же, глас хулы и поношения слышавше, в Бозе духом твоим пребывал еси. Мы же ныне просим тя: вдохни в сердца наша дух любви к Богу и ближним нашим и приими милостиво величания сия:

Радуйся, в кротости и смирении Христу Богу и Пречистой Его Матери подражавый!

Радуйся, силою свыше на брань противу сил преисподних препоясанный!

Радуйся, скорби и испытания в богатство духа претворивый;

Радуйся, грешников ко исправлению направляющий!

Радуйся, пламень злобный струями любви
твоея угасающий!

Радуйся, молитвами твоима веру нашу
укрепляющий!

Радуйся, помраченные умы наша
просвещающий;

Радуйся, окаменелыя сердца наша
оживляющий;

Радуйся, священномучениче Николае, теплый
молитвенниче о душах наших!

Кондак 8

Странно и преславно бысть житие твое,
богомудре Николае, ты бо, нищету духовную,
паче богатств и славы мира сего, возлюбивше, в
подвигах молитвы и благочестия сокровище
нетленное души твоея стяжал еси. Кто же убо
возможет достойно воспети страдания твоя, яже
Христа ради добропобедно претерпел еси. Мы
же, вся сия же, поминающее ныне, Богу
Нашему, Дивному во святых Своих, умиленно
взываем: Аллилуйя!

Икос 8

Всего себе Господу предал еси, святой
новомучениче Николае, егда взяша тя нечестиви
и в темницу ввергоша. Ты бо благодатию
Христовой укрепляемь путь страданий
добропобедно прошел еси. Мы же,
вспоминающее о подвигах твоих, восписуем ти
хваления сия:

Радуйся, яко неблагомысленных наветы
претерпел еси;

Радуйся, яко от яростных поношения приял
еси;

Радуйся, неправедный приговор с кротостью
приявый;

Радуйся, крилами богомыслия сети вражия
сокрушивый;

Радуйся, заповедь Христову о любви ко
врагом исполнивый;

Радуйся, пастырю, за Христову веру
пострадавый;

Радуйся, последователю верный распятого
Учителя;

Радуйся, споспешниче усердный ада
Разрушителя;

Радуйся, священномучениче Николае, теплый
молитвенниче о душах наших!

Кондак 9

Вся помыслы и все упование на Спасителя
Нашего возложил еси, страстотерпче Николае,
егда во узах темничных суще, от гонителей веры
Православия оскорбления, надругания,
заушение и биения незлоблively приял еси,
моляще Всеблагаго Христа о даровании ти в
муках терпения и во страдания – укрепления.
Мы же, Господа Нашего, озарившего тя светом
своим во дни испытаний твоих, вопием Ему:
Аллилуйя!

Икос 9

Вития многивещанные не довлеет по
достоянию восхвалити праведное житие и
мученическую кончину твою, всехвальне
Николае; обаче же мы, любовью к тебе
подвигаемы и надеждою на предстательство
твое окрыляемы, со смирением и верою таковые
похвалы приносим ти:

Радуйся, венец терновый на земли
благочестно носивый;

Радуйся, венец нетленный на небеси от
Господа получивый.

Радуйся, нужды наша ко Престолу Божию
возносящий;

Радуйся, от глада духовного всех нас
избавляющий.

Радуйся, светом радости души наша
озаряющий;

Радуйся, суетную славу мира сего презирати
нас научающий.

Радуйся, отраду и утешение нам
ниспосылающий;

Радуйся, от напрасныя смерти нас
изымающий.

Радуйся, священномучениче Николае, теплый
молитвенниче о душах наших!

Кондак 10

Спасение и славы вечная достиг еси,
святый новомучениче, егда верности Христову
ради претерпел еси страдания лютыя и смерть
мученическую. Мы же, память твою святую,

благоговейно чтуще, просим тя, отче наш Николае, исцели недуги наши духовныя и телесныя, да и тобою Благодеющему нам Господу смиренне воспеваем: Аллилуйя!

Икос 10

Царю Небесному верность во страданиях твоих сохранил еси, священномучениче Николае, во след апостолу помысляюще: «аще бо живем, Господеви живем, аще бо умираем, Господеви умираем» (Рим.14:8) и тако без боязненно пришел еси к венцу жития твоего земнаго. Мы же, воспоминающе о подвигах твоих, восписуем ти хваления сия:

Радуйся, слезами и молитвами к смерти ся предуготовивший;

Радуйся, токмо во Христе Распятом отраду обретавай.

Радуйся, достойно мученическую кончину приявый;

Радуйся, велию верою твоею страх смертный победивый.

Радуйся, кровию твоея торжество веры Христовой явивый;

Радуйся, ризы твоя в крови агнчей
убеливший.

Радуйся, пренесением мук лютых тленная на
нетленная преминивший;

Радуйся, терпением твоим верных христиан
возвеселивший.

Радуйся, священномучениче Николае, теплый
молитвенниче о душах наших!

Кондак 11

Пение наше молебное не призри, святой
Николае, се бо любовью подвижаемы ко святому
образу твоему притекаем и просим тя: сохрани
нас в вере христианской, во всяком благочестии
и чистоте, да в смертном успении нашем
обращаемся достойни Господеви воспевати:
Аллилуйя!

Икос 11

Светоносным сиянием троическим (выну)
озаренный, богоблаженне мучениче Николае,
просвети и наши сердца, мглою греховною
помраченныя: да елеем дел благих возжегшее
угасшие светильники душ наших, сподобимся
внити во обители небесныя, идеже ты ныне
веселишися со всеми от века Христу

угодившими и слышиши от нас благохваления
сия:

Радуйся, во свете лица Божия присно
пребывающий;

Радуйся, по Бозе вся благая нам взыскущий.

Радуйся, от горных высот на помощь к нам
ускоряющий;

Радуйся, страсти душевные и недуги
телесныя от нас удаляющий.

Радуйся, о спасении нашем Спасителя
умоляющий;

Радуйся, милость Богородицы к нам
приклоняющий.

Радуйся, кротких и благих нравов
благоискусный насадителю;

Радуйся, нечестивых и душетленных обычаев
неуклонный искоренителю.

Радуйся, священномучениче Николае, теплый
молитвенниче о душах наших!

Кондак 12

Благодать Божию и милость нам подати,
прощение грехов и направление жития
ниспослати испроси нам у Милосердного

Господа, святой отче наш Николае, и не престай о нас пред лицом Вседержателя Бога моляще, яко стяжавший к Нему дерзновение преславное. О сем же усердно к тебе припадающе, просим и благоумиленно зовем всех Творцу: Аллилуйя!

Икос 12

Поюще пение похвальное усты недостойными, уповаем на милость Божию и твое, страстотерпче Христов Николае, заступление и предстательство за нас, многогрешных, и просим тя: не престани молиться за ны купно с всеми новомученики земли нашея, да помилуй нас Господь сего представительства ради; о сем же воздыхающе, таковые похвалы ти, святой Николае, приносим:

Радуйся, со всеми святыми Престолу Божьему предстоящий;

Радуйся, с воинством мученическим Творцу хвалу возносящий.

Радуйся, труды наша на пути спасения облегчающий;

Радуйся, недугом пианства страждующих исцеляющий.

Радуйся, к покаянию всех нас призывающий;
Радуйся, бремя житейское носить нам
облегчающий.

Радуйся, милость и утешение всем верным
являющий;

Радуйся, милосердие Божие к нам
приклоняющий.

Радуйся, священномучениче Николае, теплый
молитвенниче о душах наших!

Кондак 13

О святой угоднице Божий, новомучениче
Николае прими усердное сие моление наше, от
любве душевныя тебе приносимое, и умоли
Всеблагого и Всемиловитоваго Господа и Бога
Нашего избавитися нам от всякого зла и
напасти, да благочестне в веце нынешнем
поживем и блаженство живота вечнаго
молитвами твоими обрящем, о тебе же
благодарственно воспевающе Господеви:
Аллилуйя!

Этот кондак читается трижды, затем икос 1-
й и кондак 1-й.

Молитва

О избранниче и угодниче Христов, священномучениче Николае, Церкви Русския столпе непоколебимый, земли нашея благое прозябение и красный плод, сродников твоих предстателю и наставниче!

К тебе припадаем и молимся мы, смиреннии и грешнии, и, яко отца чадолюбиваго просим: всели в сердца наша любовь, еюже к Богу и ближним твоим при жизни земней преисполнен был еси, яко и душу твою положил еси, мученически пострадав. Научи нас, отче Николае, подражати тебе верно, Бога и ближних наших любить искренне и заповеди Господни совершати непогрешительно, да будем и мы с тобою чада Божия, не по имени токмо, но и самим делом и всем житием нашим.

Призри благоутробно на всякую душу христианскую, милости и помощи от тебе ищущую. Буди всем нам в болезнях - целитель, в скорбях - утешитель, в печалех - избавитель, в бедах - помощник, в час смертный - покровитель, да помощью молитв твоих святых сподобимся и мы грешнии спасение вечное получитьи и Царствие Небесное унаследовати.

Ей, страсотерпче Христов, не посрами упования нашего, еже по Бозе и Пресвятей Богородице на тя крепко возлагаем, но яви нам многомошное заступление, да хвалим, славим и величаем человеколюбие дивнаго со святых Своих Бога, Отца и Сына и Святаго Духа, во веки веков. Аминь.

